

四庫全書

集部

欽定四庫全書

集部

九靈山房集

年譜
卷一

詳校官檢討

臣德生

中書臣劉源溥覆勘

總校官庶吉士臣倉聖脉

校對官主簿臣汪日贊

謄錄監生臣張鴻仁

欽定四庫全書

集部五

九靈山房集

別集類四元

提要

臣等謹案九靈山房集二十卷補編二卷元

戴良撰良字叔能浦江人嘗學文于柳貫黃

潛吳萊學詩于余闕明史文苑傳明太祖初

定金華時用為學正良棄官逃去至正辛丑

順帝用薦者言授淮南江北等處行中書省

儒學提舉後至吳中依張士誠知士誠不足
與謀挈家浮海至膠州欲間道歸庫庫軍庫
庫即世所稱王保保百戰以圖恢復者也會道梗
不達僑居昌樂洪武六年南還變姓名隱四
明山十五年徵入京欲官之以老疾辭太祖
怒羈留不釋次年四月卒於京師然迄未食
明祿也良世居金華九靈山下故自號九靈
山人其集曰山居稿曰吳游稿曰鄞遊稿曰

越遊稿跋又云集外有和陶詩一卷今檢集
中越游稿內已有和陶詩一卷而其門人趙
友同所作墓誌已云和陶詩一卷九靈集三
十卷不在集目之內或本別有和陶詩一卷
而為後人合併於集中者未可知也良詩風
骨高秀迥出一時睠懷宗國慷慨激烈發為
吟咏多磊落抑塞之音故其自贊謂歌黍離
麥秀之詩詠刺水殘山之句蘓伯衡贊其畫

像亦謂其跋涉道塗如子房之報韓其彷徨
山澤如正則之自放云乾隆四十四年七月
恭校上

總纂官

臣紀昀

臣陸錫熊

臣孫士毅

總校官

臣

陸費

墀

九靈山房集原序

九靈山房集者浦江戴九靈先生所作之詩文也先生以聰敏之資篤誠之志而學文於柳待制先生黃文獻公又學詩於余忠宣公闕故其文敘事有法議論有原不為刻深之辭而亦無淺露之態不為纖穠之體而亦無矯亢之氣蓋其典實嚴整則得之於柳先生者也縝密明潔則得之於黃文獻公者也而又加以春容豐潤故意無不達味無不足其詩則詞深興遠而有鏘然

之音悠然之趣清逸則類靈運明遠沉蔚則類嗣宗太
冲雖忠宣公發之而自得者尤多夫詩文之法具於六
經而得之者鮮蓋其說固在於方冊而口傳心授之要
實又在於師承也不得其要不惟自誤而又以誤人所
以必就有道而正焉者此也先生游於三先生之門朝
論夕講日探月索故能得其得有其有而發之於外縱
橫上下無適而不合可以黼黻可以弦歌安有如是而
不傳者乎先生名良字叔能浦江有九靈山戴氏世居

其下故以名其集云至正二十五年十月朔日中順大
夫祕書少監揭泐序

文未易知也惟用心於文而致其精者能真知之然亦
難矣今世學者喜為言論毀譽生於愛惡美惡惟其所
好紛然自以為知文而卒莫之知也不亦厚誣天下哉
若余友揭君伯防之於戴先生叔能論其文言其承傳
所自皆精當可徵予嘗友於叔能不能易其言也君以
文學名當世故能知之也真然非真知斯文者亦孰知

余言為信哉洪武十二年十月既望前翰林學士承旨
嘉議大夫知制誥兼修國史兼太子贊善大夫同門友
金華宋濂書

昔者浦陽之言詩者二家焉曰仙華先生方公烏蜀先
生柳公方公之詩幽雅而圓潔柳公之詩宏麗而典則
大抵皆取法盛唐而各成一家言用能俱有重名於當
世然方公隱者其詩傳之者鮮而柳公則嘗待制翰林
天下莫不膾炙其言辭於是二公不可作矣繼其學而

昌於詩者又得吾戴九靈先生焉九靈之詩質而敷簡而密優游而不迫冲澹而不攜庶幾上追漢魏之遺音其復自成一家者歟蓋柳公學於方公而九靈師事柳公為最久淵源之懿信不可誣禕嘗讀其詩而為之言曰三百篇而下莫古於漢魏莫盛於盛唐齊梁晚唐有弗論矣今而浦陽之詩實有之九靈之詩其傳也必矣嗚呼世有知言者其以吾言為不妄也哉翰林待制友生烏傷王禕序

士未嘗欲以文名世也以文名世者士之不幸也有可用之材當可為之時大之推德澤於天下小之亦足以惠一邑施一州盡其心力於職業之中固不暇為文然其名亦不待文而後傳也至於畸窮不偶畧無所見於世頗自意世之人既不我知則奮其志慮於文字之間上以私託於古之賢人下以待來世之君子烏乎是豈其得已哉此余於浦陽戴先生而有感者也先生異時在承平之世從鄉郡大儒待制柳公貫侍講黃公潛遊

俊偉秀發軒然時輩中已有文名然志在用世未暇切切於此也及事與志乖所如多不合知其無所就功名遂抑情遁迹盤桓乎山巔海澨訪羽人釋子而與之居益肆力於文凡觸心抵目天地日月寒暑山川草木奇異之觀羈人狷士之遺跡隱行皆紀而載之因以寫其無聊不暢之思發其瑰傑磊落之氣清深雅潔往往無媿於古之能言者雖其用意精絕而先生之窮不幸亦至矣然世之得所願欲食祿據位者何限求其勲業則

未之有聞問其同時之人已不識其姓名者有矣彼雖
幸未必非不幸而先生之窮庸知非幸哉先生之子禮
輯錄成帙辱以相示余非能知先生者然亦有志於斯
事故附私說於後使觀先生之文幸者可以自省而不
幸者足以有發也前太子正字奉議大夫晉府左長史
四明桂彥良敘

欽定四庫全書

九靈山房集

年譜

先生諱良字叔能號九靈山人一號雲林先生居鄞
時別號囂囂生其先杜陵人唐咸通間浙東節度使
諱昭始居越子鎮撫使諱堂居浦江之九靈山下遂
世家焉祖諱濤父諱暄母劉夫人

元仁宗延祐四年丁巳五月十三日丑時先生生

恭定帝元年甲子先生八歲 先生以母命育於姊是歲姊歸邑城趙君攜之以行其後從師問友授室卜居皆依焉姊卒先生服之期年

順帝至元三年丁丑先生二十一歲 子樂壙誌云至元丁丑起為月泉書院山長

四年戊寅先生二十二歲 七月丁母劉夫人憂居山中柳待制戴孺人墓誌云至元四年春月泉書院任為直學試肅政府歸而母病閱四月母病不起

六年庚辰先生二十四歲 四月吳文貞卒冬就室縣
南趙氏遂卜築居邑城

至正元年辛巳先生二十五歲 有浦陽人物記後序
二年壬午先生二十六歲 五月柳文肅卒時吳文貞
萊柳文肅貫黃文獻潛皆以經術文章鳴於世先生
往來受業盡得闡奧於文肅尤親密至是經紀其家
持心喪三年乃歸有樓楨殯記吳先生哀頌詞吳原
伯哀詞原伯蘭溪人哀詞云前年夏余舟次溪許

七年丁亥先生三十一歲 二月子禮生

十年庚寅先生三十四歲 六月武威余忠宣公闕持
憲節過婺州聞先生善歌詩見時與論古今作者詞
旨優劣曰士不知詩久矣非子吾不敢相語乃盡授
以學焉東陽陳君采天機流動軒記云余公至浦江
問士於趙侯謙齋侯以叔能進公深獎許之為榜其
所居之軒曰天機流動叔能命予記之金華胡仲申
烏傷王子充浦江鄭仲舒皆有記宋景濂有贊并題

後皆相與推求性命之旨而研極於義理之精微云
有容齋記柳待制墓表碑陰記九月丁父景和府君
憂居山中

十一年辛卯先生三十五歲 有浦江縣脩學記

十二年壬辰先生三十六歲 有甘棠集序送劉主簿
序喜雨詩序祭方壽父先生文

十三年癸巳先生三十七歲 有經筵錄後序浦江新
建發女星君行祠碑

十七年丁酉先生四十一歲 避兵居山中有穆爾古
蘇公平寇詩蔣季高哀詞九月黃文獻卒有丁酉除
夕效陶體詩

十八年戊戌先生四十二歲 春余忠宣死節安慶冬
明太祖取婺州明史文苑傳云太祖初定金華命與
胡翰等十二人會食省中明年用良為學正與宋濂
葉儀輩訓諸生按宋有辭郡守聘五經師書葉儀亦
以疾辭五經師不就十二人中有金信者亦隱優游

洞不就徵學正事墓誌不載或頗疑之今考文集有
郡齋守歲郡齋夜飲諸詩送欒宣使序有云余方叨
居郡庠投王郡守有云唯應馬南郡偏重鄭康成為
居門下久童僕亦多情明祖下婺以王宗顯知府事
先是郡守無王姓者蓋是時明祖初起先生以王守
深眷棲遲桑梓晦迹觀時學正之就非其本志迨膺
提舉之命而後出處之義較然矣

十九年己亥先生四十三歲 居金華七月子樂生

二十年庚子先生四十四歲 居金華有別宋景瀛詩
二十一年辛丑先生四十五歲 居金華以薦授淮南
江北等處行中書省儒學提舉先是丁酉張士誠降
於元元以為太尉先生之薦元命之行也

二十二年壬寅先生四十六歲 朱茂清哀詞云初余
客郡城寄郡東門外家焉一日郡兵戕其帥城門晝
閉余挈家遯流至烏傷茂清館之逾二月予買舟去
復居郡東門外按壬寅二月苗兵賊胡大海郡兵戕

帥即其事提舉之薦在辛丑而托跡金郡至壬寅亂
後始脫身赴任方大年墓誌所云壬寅歲尚與大年
遊處金華者是也亡妾李氏誌云乙巳留吳門與妻
金華縣君居丙午七月縣君往錢塘祭趙氏夫人文
云夫人同在官者僅三載即往武林視其孥是家屬
之至吳固以癸卯也是歲庫庫特穆爾代父總兵

二十三年癸卯先生四十七歲 以儒學提舉留吳門
有短歌行有送傅子異序是歲張士誠自稱吳王送

胡主簿序云至正癸卯予方避兵吳門時提舉儒學而曰避兵亦以自見其志歟

二十四年甲辰先生四十八歲 居吳門有元日對雪聯句有送能上人詩序夷白齋稿序是歲張士誠逐元將達實特穆爾以弟士信為江浙左丞相有送董郎中真郎中馮員外諸序有次韻除夕詩

二十五年乙巳先生四十九歲 居吳門有重脩甫里書院記贈葉生詩序金止軒墓誌銘冬納妾李氏

二十六年丙午先生五十歲 春自吳還浙有發吳門
以下紀行諸詩夏適越居鄞六月妾李氏卒於吳門
有亡妾李氏誌傷李氏妾詩秋末自定水泛海渡黑
水抵登萊欲間行歸庫庫軍前不得達僑寓昌樂有
泛海以下諸詩有贈富察鎮撫詩序吳來朋墓誌云
至正乙巳余由海道抵京師後一年航海南還居鄞
今考乙巳在吳代作陳應訪壙記在十二月納妾亦
在十二月余幽公手帖後題云至正丙午秋予與臨

安劉庸道同客四明末署九月朔日是秋時居鄞重陽後泛海定在丙午汪定海墓誌云余嘗由海道往山東候海風於鄞君時治定海朝夕過從甚悉山東九日詩去年南地過重陽皆其事也吳誌乙巳字丙午之訛耳又次益都詩云西遊應未遂又復渡滄溟先生亦未嘗至京師也 抵富陽宿縣治詩是節春已暮至古城飲馮氏家詩徒知故山近終嫌歸路斷望九靈山詩可望不可至徒多故山憶古城隸富陽

去家五十里近兵戈阻絕不得一至秋末即行泛海

是時夫人趙氏挈二子居錢唐明年始克還家

見祭趙氏

夫人

李氏卒葬尚在吳門

見李氏誌

所挾以從者唯兄子

溫耳

示姪詩自非吾骨肉誰能去鄉邑歲除示姪詩頻年同患難

艱難離別益身

家之念久不存於胸中矣

黃梨洲選抄先生文集

題其首云李氏誌明言至正乙巳冬娶李氏明年六

月李氏死此兩年之在吳可知也乃台州總管吳來

朋誌則又言至正乙巳余由海道抵京師後一年杭

海南還何其自相牴牾也蓋杭海在二十六年以後則為乞師二十五年以前則海道通問之使吳尋常有之良所以故亂其說耳嗚呼張士誠區區鹽徒而能得士如此夫亦有足多者按先生泛海非有兩事梨洲言故亂其說謂避乞師之名耳然萬里西行歸我王相未見其為士誠乞師也今全錄於此以備叅考

二十七年丁未先生五十一歲 寓昌樂有山東九日

詩秋後渡海還鄞主夏叔宜氏是歲張士誠亡十月
元罷庫庫官奪其軍十一月明兵徇山東郡縣皆下
之百猿圖記云至正季歲余附海舟南還至四明館
人夏叔宜出以相示未署云柔兆敦牂之歲良月是
丙午十月也還鄞在丁未而此云爾者記蓋作於洪
武改元之後借猿思元意旨甚明因遷就其歲月梨
洲所謂故亂其說者也不然記苟作於丙午安得輒
斥云至正季歲乎安貞堂記云由郡東門行五里所

巨室夏氏居之余方客授其家

明洪武元年戊申先生五十二歲 元亡先生隱鄞有

東山賞梅詩序

二年己酉先生五十三歲 有書畫舫燕集詩序序云

歲己酉十月初吉予偕天台毛雲莊出遊慈水之上

主東山沈師程氏

三年庚戌先生五十四歲 有祭先姊趙安人文有沈

明大墓誌銘汪定海墓誌銘

四年辛亥先生五十五歲 居慈溪之華嶼有四景樓
記云辛亥之春予來自定川方氏之彥德原邀余至
橫塘云云有辛亥除夕詩寧波府志流寓傳先生隱
慈之花嶼湖居白龍寺西軒

五年壬子先生五十六歲 居鳳湖主錢仲仁氏有移
居詩序和淵明飲酒連雨獨飲諸詩

六年癸丑先生五十七歲 趙君夫人墓誌銘云洪武
三年趙君夫人卒後二年葬又一年仲弟良始克回

自東海望墓門而哭明詩綜據此以為洪武六年泛
海南還明史亦然今考先生詩十年東海上乍離東
海郡諸言東海者皆指鄞言自鄞還浦故曰回自東
海我遊何處所北海乃其地乃指山東益都言耳洪
武初年在鄞諸作確有可據故言六年南還者誤也
是歲有祭揭秘監文哭揭秘監詩

七年甲寅先生五十八歲 有題文與可盤谷圖文

八年乙卯先生五十九歲 跋數上人蓮經云乙卯之

春予遊龍山寧波府志先生客慈最久至今慈之白
龍永樂定水金繩諸寺猶多遺蹟

九年丙辰先生六十歲 夫人趙氏卒於浦先生時在
會稽有祭趙氏夫人文

十一年戊午先生六十二歲 先生宦遊四方嘗作九
靈山圖攜以自隨所至張之壁間或即以名其所居
之室名流題詠各有時日豐城揭法至正廿五年記
云周伯溫左丞以古篆書寓室之楮間時伯溫官吳

先生在吳門故得而書之也會稽胡唯仁四明烏斯
道兩記在廿六年泛海前客越客鄞此其時也會稽
唐之淳賦則在戊午他如丁鶴年諸公歌詩共十餘
首今俱載家牒中

十三年庚申先生六十四歲 有亡女張孺人墓誌銘
黃氏南薰樓會飲詩序云庚申之秋余訪蘇太史於
黃氏義門將自是入越又云不鄙謂余方回自千里
外蓋時偶一還家便適越也先生居越無實年可考

文集越游稿中移居飲酒諸詩亦多在鄞所作慈姚
壤接來往頻仍原不得縷指何時也

十四年辛酉先生六十五歲 是年宋景濂卒於蜀

十五年壬戌先生六十六歲 五月一還浦江有天機

流動軒卷後題文冬自四明山召至金陵有太素處
士趙君墓誌銘

十六年癸亥先生六十七歲 初太祖物色先生既召
至欲授以官以老疾固辭忤旨四月十七日卒於寓

舍蓋自裁也或曰卒於獄子禮奉骨歸葬浦江縣南
嘉興鄉西山之原夫人趙氏同穴劉績霏雪錄云有
胡僧相九靈日後當有一難壬戌冬果死囹圄

見黃梨洲

抄本今按壬戌冬當作癸亥夏

欽定四庫全書

九靈山房集卷一

元戴良撰

山居稿第一

四言詩

平饒信詩

并序

廼者中原俶擾列郡繹騷王師下征負鄙不服及
至精兵四集遂復突出東南轉攻武昌延及饒信
時羅羅公為江浙行省左丞實被命分討以當饒

信之衝公方帥師上道而衢之開化常山江山亦相繼陷勢甚張橫乃兼行至衢令諸將分守三縣之嶮間出挑戰以挫其鋒已而所向俱捷因急擣玉山以奪信城信城既下寇猶三面固守扼江為陣諸將領兵四進且戰且前寇乃并衆江曲以備公責戰益急諸將合戰益用命後竟破其陣斬首萬餘級復以鉛山諸處猶往往從寇未下乃設法購賞遣數騎往諭使自新於是其黨縛寇將致麾

下降人卒以萬計遂進駐上饒分道撫慰而樂平等縣亦望風納款願擊寇自效公得寇黨輒釋不殺用其策戰數有功由是饒信悉平而二郡居民之散亡者亦皆招集安定以撫有其舊業久之事聞於上上為嘉歎命出黃金繫帶即軍中賜之仍俾鎮其地於時江西湖廣久為寇巢閩關以南相挺繼變而浙水之西亦淪沒不常惟我饒信克清境土截然中居此其為功不既大矣乎昔唐憲宗

命裴度李愬平淮右之亂河東柳宗元嘗作雅詩
二篇以形容其功業愚雖不敏庸敢竊取斯義謹
為詩一篇凡三百六十言雖不及柳氏之鋪張諷
詠庶幾指事實錄有以載我公之豐功大業於無
窮其詩曰

皇奮厥武于蔡于徐彼兇卒迷敢抗天誅王旅嘽嘽怒
若虓虎是迅是躍以夷醜虜寇乃敗逃自鄂而饒而信
而衢奔騰叫譟惟時我公出次于東既禱既禡駟馬龐

龐羣師請命于皇之訓踣彼頑囂宥此惠順載紆金節
載礪雕戈龍盾虎旗皇威是荷進次于衢寇克莫逞既
克三邑彼卒大窘遂逼信城信城猖獗有不能守復據
以江公曰爾帥勿徐勿亟四軍並作誰其汝克或敗其
腹或披其枝大袒而前不見刀鋸寇窮輒走潰其羣醜
刃不纏腰紅不怕首公曰其追殄滅是期卒刳乃肉血
手淋漓凡變之始衆或附起翦厥渠魁下人罔治皇有
恩言我是用宣單車朝出降幡暮懸螟螣已除稂莠亦

斥式廣德心以奠鄉國孰饑孰寒孰呻而歎孰病不治
我惟汝安乃留乃處乃徹我土匪逸其居王師之所皇
謂我公爾其克艱釐爾寶帶用旌爾賢公拜稽首天子
明聖公拜稽首皇錫寵命信饒既清蔡徐亦寧惕威怵
德我武用成太平之期誰實致之天祚我皇命公是毗
公其歸相為時碩輔億萬斯年無敢余侮

穆爾古蘇公平寇詩

并序

至正丁酉春行軍鎮撫穆爾古蘇公以處寇四出

大侵我婺乃請命憲臺總率諸軍而東已而婺之永康武義等縣咸獲清厥境土轉危為安而處之積年老寇卒至繫頸麾下俯伏請命遠近聞之莫不怖駭失措罔敢違越且其師行之日市無廢賈野不輟耕誠近代將帥之所罕及良雖愚懦疲弱不得備戎行致死命以親覩其號令之嚴明軍容之炳耀然居婺之西鄙其去平寇之地不數舍近得諸傳聞可考不誣又粗嘗讀書執筆為文章是

宜首出歌詩以稱述其萬一輒依古作四言詩一首凡五百一十有四字庶貽諸後世有以見公之忠勇其詩曰

於皇乃元奄有萬方孰為小醜敢擅而狂維括有民厥細如蟻竟怙其姦叫呶以起根既蟠矣苞枿薦達其出穰穰彌甌蔽粵遂忽西奔以蹂我土披其都邑扼其嶮阻維是戎士狃於安平莫振而伍獨戍以兵桓桓我公虎奮臺端請師往征其徒三千亦既禡纛于門于社獸

盾熊旗魚魚雅雅我出我車自彼征途庶士餞之清酒
百壺乃命其佐敕我卒旅是惠是馴以綏士女勾無之
野嫠女之墟男歌于道婦笑于廬進次于峴其衆蠢蠢
士飽而騰將勇而奮公曰勿亟我山我川我其詢之周
道宛宛遂申部曲選爾精銳爰拔爰克指日邁逝兵貴
奇勝以退為進彼克罔知遂乃大慶起召而黨炙牛行
酒謂今汝勞嫠其可有既謀厥謀羣師倍驍乃晝其宵
乃邇其遙彼曾不虞卒見窘迫廣野茫茫無地可穴莫

挾汝弓莫椎汝鼓投汝戈矛歸我砮斧其黨復集卒抗
我師窮凶極頑洋洋而來我公曰嗟是不可宥進截其
衝潰其羣醜諸將四合以翼以前械手繫脰俘獲連連
我公曰嘻寇情靡惻益蹈彼疆胡陳是壁寇乃日蹙莫
究所圖卒火其廬自殲厥家捷上臬臺有命召公勿久
煩苦歸奏爾庸公乃返旆整兵頓馬曰安其驅毋恐觀
者其亂既平我土悉清克清我土維我公之武武其戢
矣發民諱矣諱我發民惟我公之仁惟公布仁惟天降

報皓髮龐眉錫公壽考既錫以壽復介以福金節煌煌
享有百祿公曰無庸匪我之功天子仁聖以釐萬邦爾
發既定四方亦安乾清坤寧皇家萬年

贈趙謙齋

昔宋之季靡國不夷宗守盪失遵彼四陲乃淪洪胄在

江之渚

其一

迨茲聖世皇極已建四海歸疆三邊改獻商

之孫子亦集其彥

其二

孫子云誰時謂我公蘭桂移植歲

久而逢闕彼初條茂此晚叢

其三

致此伊何克履以正聆

善若歸容惡如病神之祐之天保爾定

其四

相彼鳴鶴猶

載厥聲孰是我人而掩斯名斯名一播揚于帝庭

其五

帝

念羣黎實惟勤止爰求明德肆于百里英英朱鸞翻飛

而起

其六

南粵東甌我政我布視明聽聰察微知著民之

戴公如饑斯哺

其七

瞻彼西水其流濺濺乃紆紫綬乃載

朱轡借曰未衰亦既有年

其八

此日而邁彼月而征功成

者去天道可徵乃眷東顧棄寵遺榮

其九

囊有故衣廩有

餘粟撫茲逝景載欣載矚先民有言人亦易足

其十

既亨

爾躬復艾爾後季也青襟孟兮皓首天錫宏祉如岡如

阜

其十

祉其宏矣受年孔高龐眉纚纚鶴髮皤皤天錫

難老如江如河

其十

嗟我人斯夙邁嘉惠分遠義親年

殊志比譬彼喬松蔓葛是施

其十

綿綿蔓葛得托喬松

其根雖異其條則同每憑穹榦庶託高風

其十

大鈞載

運耄年聿屆從公華堂式宴高會有來雍雍亦振纓帶

其十

我儀既肅我情斯和豈無他人慕公實多登堂奉

觴眷戀如何

其十

欽定四庫全書

九靈山房集

七

春暉堂詩

春日載遲有耀其暉彼居之子永念庭闈簣土之孝泰
山之慈欲報之德中心慊而

何以寫心聿構斯堂有酒有酒載崇于觴爾肴其潔爾
饌其香不有慈親云胡以康

嗷嗷林鳥鳴我堂陰我豈不如懷此好音好音克懷實
勞我心爰有萱草言樹之襟

吳集賢新堂詩

并序

吳溪吳公考堂也

必彼吳溪浦水出焉水繞山迴篤生俊賢

其一

俊賢之生

時維吳公自北自南有聲淝淝

其二

其聲謂何隆以爵位

誰其婉之超羣逸類

其三

我公曰歸有赫其光曾是故廬

闇然弗章

其四

公曰吁哉我胡止居來我工師我材于溪

其五

爰作新堂新堂孔伋其楸庭庭其楹殖殖

其六

乃闢我

寢我寢我安乃立我門我門有閑

其七

我軒我廡亦曼且

碩羗何敏哉曾不留役

其八

公作斯堂左山右池山有集

鳥池有跳魚

其九

公登斯堂以燕父老有笙喤喤有鼓考

考

其十

公居斯堂黃髮其纘有子有孫從之如雲

其十一

公

曰其徠爾我孫子其聽我言以久此宇

其十二

昔視我廬

榱竊棟橈今其輪奐豈不在我

其十三

揀之度之啟之辟

之何幽不朗何廢不治

其十四

爾承我志曰象此堂小可

為杙大可為梁

其十五

毋握爾本毋拜爾枝苟成爾材小

大具宜

其十六

衆領公誨莫不改容孰是後人而弗率從

其十七

噲噲斯堂德以為基構之以功百世可知

其十八

匪

功靡成匪德曷致小子作歌以詔來裔

其十
九

五言古詩

詠懷三首

結廬在西市藝藿仍種葵謂將究安宅何意逢亂離三
年去復還鄰室無一遺所見但空巷垣墻亦盡隳久行
得荒徑披拂認門基我屋雖僅存藿悴葵亦衰本自住
山澤此悔將何追

庭前兩奇樹常有好奇容色年年遇雪霜誰謂寒可易大

道久已喪末路多涼德狐裘已適體誰念寒途客古有
延陵子使還過徐國徐君骨已朽信義逾感激解劍挂
高樹至寶非所惜此士難再逢四顧吾何適

少小秉微尚游心在六經苒苒歲年遲乃與塵事冥入
秋多佳日何以陶我情園蔬青可摘新穀亦既升命室
釀美酒一壺聊復傾兒女在我側親戚還合并終觴無
雜言但說歲功成至樂固如此是外徒營營

和沈休文雙溪八詠

登臺望秋月
秋月光陸離
晻映西南樓
徘徊東北墀
凝華奪班扇
流輝鑒阮帷
三五暈尚圓
二八形已虧
爰有蓬鬢人
長懷桂殿思
遼城記吟詠
西園憶追隨
願以薄暮景
承君清夜暉

會圃臨春風
春風弄新陽
驅烟入閒戶
捲霧出虛堂
響谷鳥將韻
穿林花度香
逶迤動中閨
駘蕩經洞房
逐舞輕靡袖
傳歌低繞梁
所悲金玉軀
遂爍佳麗場
時拂孤鸞鏡
星鬢視飄揚

秋至愍衰草衰草遍平陸方晨露染黃入夜風銷綠別
葉有歸聲故蓋無留馥勁莖坐自摧寒叢竦如束彼物
既如斯我年寧不促已失早生榮敢冀晚凋福何當即
去茲縱浪從所欲

寒來悲落桐桐生在長林積葉既阿那攢條復蕭森排
雲正孤立乘風忽哀吟朽壤方有託急霰非所任輪囷
龍門側憔悴嶧山岑不求削成圭何待裁作琴菲薄既
非材固無斤斧侵

夕行聞夜鶴鶴鳴向天池奇聲傳月迥清思逐風悲寥
寥度霄漢噉噉傷別離華亭侶既失衛軒寵亦衰衛軒
非我顧華亭尚余思蟋蟀悟寒候商羊識陰期不有慕
類心此情那得知

晨征聽曉鴻鴻飛何處所隨陽弱水岸違寒長沙渚冥
冥憶霜羣邕邕叫雲侶固將聯匹儔豈惟念羈旅視夜
已昭晰度聲尚淒楚以之頻感觸將何慰艱阻帛書望
不來誰知我心苦

解珮去朝市朝市路已迷敢冀恩私被但嫌朋好睽彼
讒起青蠅我行玷白圭寸心幸能亮微命不終垂及今
去青瑣何日瞻泰階荒服固云忝是道諒亦迷安得同
志士三歎寫余懷

被褐守山東山東古於越州城冒陁峴嵐氣屢興沒剖
竹曰有行思君不能發指途期闌暑下車已涼月汲黯
薄淮陽子牟戀魏闕豈伊念川途固亦悲朝列日月倘
垂照猶堪慰寂蔑

寄宋景濂三首

海潮還舊浦
河流歸故道
嶺雲雖暫出
迴風復吹掃
遊子與家別
來歸何不早
路遠隔音形
感物坐空老

孤鴻失儔侶
連翩洲渚滑
自知羽翮短
不與同奮飛
寄聲奮飛者
當慎子所之
烟波渺無從
雲路迥難依
雲路多鷹隼
烟波有虞機

昔與君別日
妾蠶初弄絲
何意時運傾
寒衣今已治
衣成向誰寄
冬雪旦夕飛
雪飛猶自可
時去端足悲
韶顏

忌凋落華志驚變衰安得君子心不隨年歲移

築新居

挈杖去中林卜宅江之邊江邊多故廬改築架斯椽左
右皆廢墟南北盡頽垣昔人固不留遺迹尚依然因之
悟物理盛衰恒遞遷世既異市朝海亦變桑田古來皆
有是念此一長歎何以慰我懷斗酒傾前軒百世非所
知聊且樂當年

還舊居

自我遠行遊故廬今始歸如何廿載間舊事都已非曳
杖過比鄰相呼尋故知不見垂白翁但見初長兒我園
既稍葺我田亦就治種秫釀美酒拾薪煮豆糜一笑集
親朋相從說睽離以之感疇昔俛仰多所悲人生一世
中所憂渴與饑力耕給其用此外更何思便當息吾駕
皓首以為期

居田

我生非匏瓜於世可無食躬耕實所慕戮力歸稼穡當

春土脈動農事滿阡陌晨興負耒去日入弗遑息我苗
今已長我耕有餘隙斗酒勞近鄰隻雞禮過客人生但
如是亦足慰平昔此意誰復知千載惟沮溺

飲酒

在昔童丱時得年輒自喜謂當羽翮成青冥將立致去
去曾幾何已覺非初意每思前日事翻恨莫重遇盛衰
迭相尋壯極老會至曩也歎時遲今焉惜年逝人生已
如此有酒且須醉

送屠彥德七首

蓼蟲知習苦塞鴈知避寒人不處睽乖詎知為別難戎
馬滿東北風塵闇河關咫尺尚莫期況乃兩州間送君
危途上如何弗長歎

其一

長歎且復止請言交好始君住浣水渚我家浦川涘固
已接聲光終然異彼此末路邁多幸來為遊宦子惻惻
久念息歎歎新歡起

其二

一從新歡起幾度造門基解巾日尚早褰袵陽已微寒

光曝顏曜炎德躡來颺豈辭夏暑永但恨冬馭馳皎皎
淪迹心非君當告誰

其三

淪迹未云遂且共陶情靈新詩促座賦美酒當壚傾曉
我達生語敦我擊壤情顧已反維繫心迹猶未并家貧
仰薄祿庶以代躬耕

其四

自君羈薄祿宛轉日月除僂指弭節初三涉歲華莫世
道有遷轍天運無淹度為歡未及終已復遵往路戒途
越巖風驅車犯寒露

其五

寒露溼我裳嚴風吹我衣美人去不返後會寧可知我
居方蹇剥君行已逶遲徒堅皓首約豈遂空谷期倉卒
心已苦別久應更悲

其六

欲忘別後悲獨有惠來篇委曲風波事殷勤巖壑言蹈
海計已乖入蜀願亦愆惟思遵曩訓偃息在故山君其
慎所適晦養終百年

其七

憶胡仲申

點點階上苔鮮鮮為誰碧已別舊年人空餘舊年色我

行東齋外對之還爾惜所思雖久違猶有往來迹

歲暮遲宋景濂

忽忽歲欲暮駸駸春已迫出門尚誰思悲歌遲來客客
昔與我期近在旦與夕如何事多迂月滿且復魄悲風
一夜起落葉滿長陌女蘿雖有託近亦辭松栢萬物會
歸盡人豈無終極而我與夫子況皆年半百前途詎難
知元髮早已白若不數相過蹉跎深足惜

寄許存仁

一鳥方北來一鳥却東飛夫豈巧為避羽短風迫之方
春遊郡城子有越上期及今會吾里而我復差池常時
隔遠道睽乖固其宜豈意兩相接反更事多違畏塵念
彈冠懼垢願浣衣士有交臂失如何弗予思

楊本初見訪別後却寄

有客越中來衣帶越溪雨既來還遽辭耿耿不得語譬
如東軒月偶此成賓主浮雲一與期清光無定所出門
復入門悵望夜將午幾向雨來時念子溪之游事違人

已衰別多心更苦朝來數鬢絲近復添幾縷


答李寧之

涸鱗思赴海倦翮念歸山如何遠遊客歲久不知還世
途方擾擾豺虎尚為患久嫌軍務勞翻羨為客閒夜雨
滴愁夢晨風颯頽年丈夫雖耿介亦或多苦顏而我承
結鄰獨喜相追攀未堅金石交已枉瑤華篇時時感嘉
貺相視兩悽酸豈不欲為答情深諒難宣

鄭僉憲授官南歸

相國昔愛才有才必陶鈞至今海內士多出幕下賓鄭
君入京華兄弟盡能文鈴閣遽引見器重異常倫亦既
薦明主遂為希代珍綠衣不肯著紫綬忽在身榮名竟
籍籍一旦動搢紳等輩盡嗟異鄉邦無此人南宮既奮
迹烏府復埋輪羣公滿天闕獨出官海濱除書已久至
君命敢因循蕭蕭風雪時日暮下東津過家十二月臘
盡將及春閭里為改觀草木亦光新上堂拜慈母下堂
辭密親王事剩相拘可能逃苦辛顧茲家範嚴四海無

不聞昔為純孝子今作忠盡臣西州況久弊戰骨成埃
塵自非霄漢客曷拯溝壑民行矣在勤事毋徒悲索羣



九靈山房集卷一

欽定四庫全書

集部

九靈山房集卷二至四

詳校官檢討_臣德生

中書_臣劉源溥覆勘

總校官庶吉士_臣倉聖脉

校對官主簿_臣汪日贊

謄錄監生_臣張鴻仁

謄錄舉人_臣曹夢齡

欽定四庫全書

九靈山房集卷二

元戴良撰

山居稿第二

五言古詩

山中度歲

去年當歲暮我方家市邑時復掃新居親朋為之集天
運不可常周辰今已及投迹此山中酒杯與誰執故歡
隨歲去新愁帶春入唯獨聞爆聲依然如舊習

丁酉除夕效陶體

疊疊冬春易悠悠時運傾一歲只今宵胡能不心驚我
觀寰宇內誰非愛其生其生竟幾何倏忽已頽齡長風
向夕起寒雪沒前庭綠竹且就壓芳草豈復青萬事盡
如是何須動中情兒女方在側尊酒亦既盈今我不為
樂後此欲何成笑歌東軒下且遂陶性靈

正月五日遊石門懷所遲客

開歲已五日良辰誠蹉跎悟彼時鳥鳴往遊山之阿平

明發陰壑亭午憩陽坡崖障獻奇峭水木呈清華幽谷
既深入茂林仍遠過迢迢蹊絕蹤隱隱泉鬣莎澗固
洄沿陟峴復巍幾舍輿挹飛流停策引芳柯石甡忽雲
擁巖廣亦星羅土嗇念唐風民勤懷豳歌羽檄起淮甸
烽火連浙河無地可投足此山思結蘿良儔愆我素荏
苒當如何長嘯臨逝川汨汨感人多

飲酒古墓下作

幾幾溪南山上有雙高墳白楊夾徑路過者為悲辛人

生此世中如日難再晨有酒不肯飲奈此墳下人惟此
墳下人生慮亦良勤營營復擾擾將事百年身安知奄
忽間已與山鬼隣愚者固久泯賢才亦長湮吾今且行
遊遑恤賤與貧

哭趙隱君

泉臺一以閉長夜幾時曉傷心九原上但見青青草因
懷我疇昔從君瀝水邊雪游南浦屐月泛西溪船萍蓬
無定蹤忽復異彼此固嫌久隔闊豈料到生死斯人已

已矣此意竟誰陳弟兄既無有嗣子惟一人一人謂已
多承宗能孝思采衣正朝舞丹旒忽暮飛我來哭吞聲
亦以嗣子故平生一掬淚盡灑墳上樹嗣子泣挽我日
暮投山扉寂寞沙頭路空聞畫角悲

題蘭溪東峯亭

昔余駐蘭陰頗得溪山趣日上東峯亭遙望水東注別
去曾幾何重來已遲莫一時同遊者大半髮垂素亦或
卧空墳翳彼梅花樹因之念所思倚欄聊四顧安知游

目時翻是傷心處
咄茲露電身誰似金石固此生縱滿
百會合能幾度獨有溪上山年年只如故

有感

芙蓉在華沼粲粲有餘姿
觀者日以至朝暮被恩私
奄忽秋景逢華葉兩紛披
昔焉眷顧情一旦成棄遺
時物今尚然人事那可期
故妻泣空房嫵婉歌重帷
彼情無厚薄我貌有盛衰
願君屏荒翳馳先到幽微
不照妾容老但照妾心悲

送河南生

累歲事行役攜家逃世患已謂計頗周如何尚間關道
路滿飛塵湖海盡驚湍去此亦何之對我多苦顏將軍
急籌策英傑方未閒苟能慎所擇何憂行路難夙昔翰
墨場高步已莫攀及今白羽箭復看插腰間征人懷遠
道拘士戀故山離隔在須臾尊酒且同歡

東明山賞紅葉

萋萋秋向夕淒淒天欲寒衆木謂已凋翻見其葉丹葉

凋猶有色人老無芳顏于今得美酒如何不為歡況此
秋林下惟多古邱壠時來弗自樂時去良足歎茫茫大
化中陰陽方遞遷明朝事莫知今日且盤桓

陪鍾伯紀遊溪南山

一春苦昏墊今晨收宿霏因憶謝公語出游娛清輝溪
流深可厲草露泣未晞林木相映蔚時禽遞鳴悲佛廬
已高據鳥道方仰窺危峯枕樓閣細竹擁堦基窈窕趨
南征徘徊歎東扉倚闌眺懸瀑企檻引松枝地僻慮自

淡身閒意無違此理誰識察悟心惟朋知

節婦操為賈妻作

父母嫁妾時遺妾雙鴛綺雙鴛既同生亦復與同死當
知妾有夫結言亦如此妾夫今在遠妾身偶獨止恐為
行露侵莫與雙鴛齒飲恨赴長川川竭恨乃已

病起承諸公攜餉見過

弱齡已孤癯中歲轉多難正茲懷苦心矧復嬰病患綿
綿諸崇作擾擾五情亂入夜願曦昇及晨思景晏已謂

吾此身奄忽成夢幻亦既告宗祧併用別親串逝將委
運往知命尚奚憾造化難預謀禍福昧前算憔悴幾何
間薦覺復神觀幸生差足喜慰勞傾里閭攜肴蕪命酒
羅列稍盈案縱飲非吾事且從性所翫未知從此去幾
回同笑粲民生鮮常在百年況已半客養衰病軀寧復
幾昏旦金石尚銷毀人物終變換不共芳顏樂徒貽皓
首歎念此動余懷終觴染斯翰

病中承宋編修見過

負疴南軒下展轉兩涉旬藥石不時驗衆苦交我身常
恐大化盡無由見故人夫君一何厚抱杖來江濱慰我
仍戒我眷戀已良勤繼以習靜言益復知為親我病既
稍除君遂輕別分雲山百里外有語難為陳會合本不
常亦知當索羣但我病中懷願得稍相因既已莫能遂
且復安吾神

立秋日言懷

六龍不可頓四序忽復移氣變感人心愴然已秋時池

荷挺素質園葵奕芳蕤豈無一日好不久還當衰覽物
惜年邁撫景傷志違日暮坐空堂此懷當告誰獨有王
子喬可以解吾悲

中秋無酒

彼節忽已易吾年信難留含情及元夜逝將秉燭遊皎
皎明月光照我城南樓常時猶足賞矧乃當素秋東鄰
有美酒飲之祛百憂客途無由得虛使時運流未知明
年月還如此夜不既無典衣事空歎將誰尤

郡齋夜飲分韻得畫字

郡齋無所為兀坐度清晝如何趨府客亦此共臻湊悠
悠至深夜忽忽殊氣候驚飈觸簷檻皓月窺窗牖美景
感人心嘉會洽時秀壺既秉燭投詩亦援毫就起視夜
何其曙色錯星宿欲去復遲留茲歡恐難又人生一世
中誰似金石壽今我不為樂知有後會不為勸座上人
且盡杯中酒明晨索鏡看吾顏已非舊

送別胡仲子二首

昔與二三子徘徊在中林拊翼玩文羽長鳴懷好音何
意會飄風吹汝起高岑朝尚同枝條暮飛還異尋川流
有急波征途無緩轡舉酒欲為歡離憂已沉沉豈不懷
耿介送遠難為心

行遊途可極餞送恨何長臨分將列筵屢歎復停觴我
如雀卑棲子若鴈高翔高卑既殊勢遇合寧可常事違
已憂慄形單重周章歸卧一室中誰知我心傷

遊赤松山分韻得弟字

旦發東郭門晚憩北山趾乍離城市喧益羨邱壑美舍
車陟嶇嶇停策玩清泚遊目蒼崖顛放情白雲裏攀林
感落英涉澗悲逝水冀憑棲遁踪往遇冥寂士忽見山
阿人髣髴平與起何當垂素烟相與嚼丹蕊牧羊事已
乖鍊石情徒止長揖謝荒祠永愧爾兄弟

別宋景濂

昨宵郡齋宿今旦赴行舟官程不敢違可使須臾留掩
泣別故交強顏逐前儔未嘗去鄉邑詎能千里遊金陵

古帝鄉雄跨東南州至今開甲第奕奕居公侯冠蓋若
雲擁車馬如川流厚祿不虛授高才將見收如何獨多
念去去懷百憂

寄王子充

燕燕何從來其羽已差池飛入華堂內意在巢君帷君
帷豈不好傷哉非故知引去方未能欲留復迴疑噉噉
徒曉風翻翻空暮闌

送胡仲子之三衢

倦駕忌登陸疲舲驚出浦不處孤蹇間誰知別離苦伊
昔忝嘉招經年繆同侶前歡未云畢後感已尋緒去春
客江介今秋發溪澣久傳飛輶出及此高帆舉終然衢
士心枯茗望來雨我意固遲回君行勿躊躇

送人赴廣信軍幕

慊慊促夜絃翩翩戒晨軸臨分將列觴指景念出宿羈
思無定端官程有成速含思登迴陌抱疚度遙陸前峰
日銜岫後蹊風出谷欲投近村去惟見遠烟綠冰溪渺

森沉玉山鬱駢矗方遠悲路長逾前歎期促邊障固優
暇邊情易翻覆替政諒匪難布德在所勗古來固疆圉
豈皆藉頗牧

謁趙朝列墓

含辛度連岡掩泣赴孤阡而我為誰悲懷人在九泉西
北兵既動東南旋遘患一朝烈燄起鄰壤頓燒燔長風
當夏急亦知將燎原不謂事之及乃在奄忽間天道幽
且遠禍福茫昧然方農家盡燬夕暮身復捐平生欽若

人銳氣蓋當年鋤頑務刑肅決壅思化宣矧茲大節在
可使非義干日月易為久墓草已芊芊園林滅游跡祠
宇有餘閒既乘往化盡何用空名傳

九日宴迎華觀

授服當素節登臺瞰清穹野明棲菊霜林動振條風良
辰感情慮嘉會洽音容劍佩止肅肅冠帶來雍雍四座
錯觴豆中堂藹絲桐託蔭栢臺下寄身霄漢中為歡情
有盡報德心無窮願我賢主人功業日以隆為臣慕姬

旦為子追魯公

題赤松山清風樓

仙家十二樓恒在瀛海間
豈意逐飄風飛颺到茲山
翔簷出林表飛陛躡雲端
紫館高與齊金洞遙相連
何年赤松子揭此清風顏
每來恣登覽幾為增慨歎
陰陽無停晷江漢有奔瀾
節往速飛箭時侵逾激絃
已難駐衰厯何用羨華年
容鬢坐自凋齒骨徒空堅
澡真能脫屣煉液解騰天
凡心倘可除神道尚堪傳
便將棄囂俗終

往訪靈仙飛身此樓上千齡猶未還

送人從戎

世事諒難必伊人去從戎平生二三策乃用軍帳中東
郊已春陽北陌尚寒風千里違鄴城幾日到邊封漢幟
正星羅淮騎亦雲從已入青油幕猶帶駢角弓願言帷
幄士勉贊戎馬功但期膺厚賞不忘捐薄躬庶幾邊上
人咸識爾為雄

友人使還

分壤蕃帝室，擣堞奠公家。羣士盡歸往，若人更才華。一朝銜命出，千里飛佩過。大志眇滄海，微功騰尺波。遂將總主心，調入望鄉歌。嚴軍發發城，去棹指齊河。復命喜事畢，問程憂路多。憂喜君不渝，眷眷將謂何。

送人歸姑孰

一官冒風塵，十載犯霜露。豈伊懷祿情，亦以娛親故。長途忽榛棘，四海益氛霧。父母且不知，妻子豈得顧。闔海非我鄉，浙河幸余渡。誰知消息近，反使心魂懼。桑梓半

不存骨肉定何處掩骼古則然脫轡今豈遇言歸雖有
期悲情將焉訴蓼蟲昧葵董晨雞識晦雨君自處平世
安知我心苦

送人赴辟

江路西南遠江波東北流客行惜奔景日暮赴輕舟
軒急才彥巖穴盡羅搜名既上公車身可安舊邱人生
遇昭世誰能老遐陬武夫效命力君子輸智謀入夜無
輟棹侵星有飛輶不見百川水汨汨俱不休

贈賈思誠

短願本有涯長憂自無端道心日迥絕衰病坐連綿
瑤琴廢不理金鏡掩莫看誰能蠲茲疾併用駐吾顏
澡真藉靈草測化竒神丹神丹法已闕靈草名尚傳
或求向蓬島或采自鍾山何彼巫咸輩竟墮伎術間
楚辭稱九折周禮稽十全問名未為悅染味方自歎
賈生妙斯理輜使旌其賢莫言相遇易知音古猶難

題李愷傳

有元值陽九羣兇方構患大將擁旄節受命徒空專李
生在下位世頗稱其賢一朝慕許歷敗軍惟片言東嘉
已電掃古括猶禍連既登壯士籍身名寧兩全負戈馳
入境轉戰溪谷間智勇自無匹英雄偶速遭事業不可
竟忠節乃所安凭軒檢遺事三讀使我歎功名固自薄
竹帛向堪傳

寄友分韻得枝字

彼山猶有崖此木猶有枝而我懷所思憂來獨無時我

有澤上蘭春至嘗猗猗折柔欲有贈延意及秋期秋期
日已逝蘭葉日已衰人生非草木勿為寒暑移

九靈山房集卷二

欽定四庫全書

九靈山房集卷三

元 戴良 撰

山居稿第三

五言古詩

題茂清齋

疏傳固知退貢公未遺榮如何郡齋上榜此林棲名伊
昔宅姑孰迢遞瞰修垌羣山既羅戶迴澗亦當庭山行
睇松茂澗涉玩泉清此歡謂可終外事始難并理棹蕪

湖水剖竹婺女城昔也樂肥遁今茲倦將迎幸當官事
治復值民俗寧虛館絕諍訟空堦長苔蔘罷吏就閒散
卧病謝纏縈曾是懷舊想眷焉起深情徇名道不足適
意物可輕寄語浮邱翁長憶子音形

九日送別分韻得菊字

霜林醉秋萸雨徑卧時菊折以贈將歸意遠悲別促

城東會飲送王天錫

陰崖斂暝霏霜陸耀晴睨蕭蕭落木多綿綿衰草遍開

冬感徂物列飲會羣彥美醕溢流霞妍談繁餘絢時髦
非我匹清尊豈余戀行矣送將歸悵焉罷歡宴引領阻
雲從搔首歎蓬轉

送人還鎮

根碩多繁條源濬有清流尊公啟洪胄英子紹前猷肇
允龍淵升翻飛鳳池遊光分發硎劍氣壓噓蜃樓下車
儼如昨去旆已莫留西州實吾鎮東路安足由帶甲踰
萬人連舫動千艘桓桓順時發行將紓國憂

題愛栢軒

瑟瑟涼野風竦竦寒城木風勁木亦然受命一何獨歲
物已淪傷高標誰賞錄偶荷主人恩開軒向城曲老枝
扶戶吟密葉停窗綠遂忘孤生悲行享後凋福有客政
迷方振衣時躑躅願為栢上枝託蔭歸君屋

送劉仲修

名都鬱佳麗公室赫宏敞續續集時彥袞袞歸世網若
人固忠勤受命逾震蕩藩國簡車徒邊亭巡境壤道途

邈以夏山川脩且廣月宵抱影息霜晨流念往仰看零
露團俯聽悲風響景物勞夢思驅馳罷心賞去水無回
波長途有徂鞅臨分恨莫留搔首獨長想

送劉彥英東還

轉蓬無定在飄飄將何之未遽離本根賴有回飈吹在
昔從一官整駕來南陲何意十載留竟負三年期上有
垂白親下有初長兒平生已艱瘁況復當亂離及茲神
武師拓地如拾遺遂令客行士秋晏薄言歸慈母既生

還弱子亦抱持歌舞入故都志願幸無違鴻鵠遊四海
鷦鷯守一枝寧與鷦鷯處不隨鴻鵠飛

詠省堂後竹

冉冉孤生竹託根淇水渚何年被簡拔移植鳴鳳池鳴
鳳準寒律豈待伶倫吹

雲樵子

抗志薄囂世結茅向雲林簷靄起膚寸庭樹圍十尋不
見從龍勢惟聞伐木音買臣抱才智遺烈著來今當其

樵采時久困稽山陰富貴違壯年伉儷易常心丈夫有
述邈達士甘滯淫永言慮崇替聊且投吾簪

舟發嚴陵承以愚天錫諸公追餞

祇役旋故都艤舟析良知臨岐辱飲餞舉觴念睽離躑
躑東城闌徘徊江水渚頽陽無停照別畧有成期屏迹
堪養病樂道可忘饑持此將久息豈伊聊暫違願各崇
令德蜚聲慰棲遲

舟中有懷以愚天錫諸君子

積雨夕澄霽曉行出東郭解纜遡驚急懷舊復淹薄離
情固難抑歸思亦隨作鼓枻就隈隩指途阻參錯嶮當
嚴公瀨勢奪呂梁壑側耳聽波濤縱目窺巖壑永懷滄
洲趣久負泉石諾及此協幽期逝將資止託安得同心
客共恣一時樂

舟次蘭陰憶寄君善敬德濬仲諸友

曉帆發嚴瀨暝棹次蘭陰悲歌泛迴渚引領睇長林眷
言遵舊蹊欲往訪所欽水行厭棲薄室邇阻窺臨川靜

集潛虬林茂萃鳴禽獨無羣居志感歎難為心

謁彥修先生墓分韻得風字

楊公泣路岐阮生哭途窮撫心苟有懷出涕豈無從吞
聲度重阜銜恨眺連峰若人久已沒古士將誰逢時春
卉木芳勝會嘉友同豈無尊中醕盡灑墳上松埋玉悼
遺迹解劒慚古風長歌欲自慰情深眷彌重

悲亡友朱茂清

人亦孰不死爾死獨堪驚平生一掬淚寧不為爾零在

昔避兵亂倉皇託門屏一時急難意視之猶弟兄動靜
既殊勢去住遂分形東臯把袂時豈意竟先傾雙親已
垂白諸允纔弱齡遺事竟誰託素志終難成流幻一世
中運往誰得停形神既久化何用哭吞聲

送別王天錫

久懷山澤居胡乃憩長途直為知己故欲行復躊躇戀
戀交情結漫漫歸思紆決去既不忍淹留欲何如眷言
命徒御逝將理舟輿已無軒冕累自多林野娛但恐禮

羅密不似禁網疎且遂一朝願明日非所圖

題栖碧山人卷

都邑集豪右山林遺隱淪
隱淪端可慕豪右何足陳
少小悟斯理出處故絕人
杖策託幽棲抗志辭垢氛
陰谷掇丹萸陽岡望白雲
對綬不敢綰臨符寧肯分
晚節嬰世務薄言走風塵
投耒襲珪組解褐紆縉紳
始願竟難畢俯仰悲此身

送胡鍊師還山

有客挾丹簡出遊齊魯間行將入苦縣亦欲歸函關世
途屬多阻故里聊復還神仙苟難遇畢志巢空山

九日偕子充安道諸友遊城東

四序逝若飛忽忽授寒服曉徑菊乳黃暝林葉辭綠居
人驚節至行子感時速步出東城闌寄傲雙溪澳挹流
當芳醴聽籟代鳴笳夕陰斂空陂頽陽照平陸願得重
留連從夕至天旭

贈別呂用明

旅鴈薄霄遊輕鷗掠水飛相逢多間阻所向有高卑偶
此風雨過解后洲渚潒翩翩形影亂噉噉鳴聲悲日落
水氣寒月高風景移矰繳發中流又復夜驚離回翔空
有志棲宿定何時飄飄天衢上往慎子毛衣

贈鐵冠子倪仲德

武士貫却敵文儒我進賢獬豸勵憲臣鷄鵲寵郎官鄭
嘗聚酖毛宋亦表華山為容豈非美弗稱斯厚顏有客
類疲繭秉志實剛堅既用石為腸復使鐵作冠逢萌不

許挂貢禹那敢彈巍峩堂序上逍遙階陛間古制世則
知古心人不傳因歌君子德用繼緇衣篇

使客還自建昌

埭雞初戒曙關吏已開晨飭徒臨迥陌振楫發長津四
郊盛陰氣千里塞驚塵艱難將使命騷屑作行人時值
秋冬交道經吳楚分昔出方禡師今還已歸軍威遲良
馬勞悽惻僕御勤王事不可淹誰知君苦辛

送人還蕪湖

連汀羃牛渚平原帶鳩茲卧矚浮邱室行尋謝朓詩偶
隨樵風便來憩淞水渚登樓憶吟守遊山懷牧兒昔至
雪載途今別露霑衣驅車子流感輟棹我馳思風雲有
衢路寥廓無曾機矯首羨歸翼翼已高飛

苦齋

薄遊倦簪履斂性偃林阿羣峰既旁繞衆卉亦前羅暄
風改故栢微陽變陳蘿茶生綠階上櫟長即軒多察性
寡柔葉辨味掇芳柯苦節既可貞佳名矢弗訛享歎寵

王使集蓼奠皇家尊盛猶若茲庇賤將奈何願賜卜身
訣庶免後賢嗟

看松菴

結構在中林林木何離離簷隅聳喬幹庭際俯樛枝蜿
蜿鹿尾揚矯矯龍形垂稠陰暗軒戶積髓滑階基美人
遊未還素心適在茲豈不念封植無由敦佳期岱畎稱
夏書徂徠詠周詩屈身古則然違志今豈非急雪交橫
至巖飈左右吹所貴貞白質不為寒歲欺

同子充濬仲遊北山夜宿覺慈院

窮年厭喧囂今晨愜遊行
豈伊清曠懷直為朋知展指
途陽已昇入谷光未顯涉流
既百折尋山亦千轉停策
樹頻倚攀林芳屢蹇路夷始
出幽山暝復凌緬佛廬既
棲薄僧榻聊息偃地僻心自
怡俗遠慮乃遣明發有佳
趣勝處將歷踐

抵智者

已宿隆壽山復踐靈源境
蜿蜒苔逕長犖确石路整行

愛祇樹密坐悅禪枝靜幽意澹不愜遊足憩復騁睇瀑
跂崇基追雲躡曾頂行行路已窮望望日將暝泠泠風
出谷皎皎月窺嶺翳翳羣動息寂寂紛務屏以之觀化
機緬焉發深省此身如露電百年亦俄頃如何垂賞心
驅馳昧風景綠業倘可除庶茲慰延頸

從智者遊九龍謁劉孝標祠

上人敬愛客追從不知疲昔聞蠟屐遊今見飛錫隨朝
暾烜將出曉露泣未晞捫葛緣側逕披榛款幽扉水聲

激澗滑鐘韻出林遲佛廬從中起祠宇亦旁依行歌懷
昔賢趨拜想前徽躑躅久不去此情誰得知

往三洞

既停九龍策瀝醕禮前賢復尋三洞蹊秉玉朝羣仙羣
仙去綿邈遺迹費采甄標峰絢霞外裂竇綵雲間旁聽
流活活俯瞰深淵淵脊曲駭初入膝阻艱屢遷躡迥方
蠖伸緣隅乃猴牽冥行路易失前導火頻然傾壁見斜
倚危室覩孤圓穴杳石如透潭空海疑連涉深怯龍躍

出險怵途慳紆徐度虛隙恍惚脫重泉僕御矜乍往朋
徒慶生還夙志愛遊役芳時屢徂讐流光忽我邁踐勝
及茲年棲息固有期遲莫復何言二皇倘可值頽齡庶
能延

登鹿田

山北倦遊覽山南縱攀援苔滑豈可步蘿弱猶足捫力
竭轉脩蹊險盡得平原排峰作郭郭列岫代墉垣披拂
趨蘭社靡迤入松門奇石既羅逕初簞亦當軒鹿耕事

固遠仙化迹還存野田遺舊場孤冢秘精魂感往情已
劇懷來念彌敦學道值時阻攝生逢景奔何能棄緣業
即此窮朝昏

贈別祝彥明

悵望臨荒蹊驅馳騁遐步江紆練月初山標綵霞莫天
長路易迷水深舟難渡征人去不息倦僕立相顧此時
悲送君安能髮不素

七言古詩

雙劍篇

君不見干將冶鐵鐵不流
鑄耶遇之翦指投赫然鍊成
雙寶劍遂匿其陽以陰獻
雌雄離隔經幾年一朝飛墮
君侯前乃知神物不虛授
必待英豪始聯偶從今永近
君侯身玉頭珠口相鮮
新韜裏束來白鷗尾匣中藏却
綠龜鱗遭時未息干戈事
且為君侯充武備黑犀中斷
未為奇白蛇夜斬方稱利
五山精六金英也曾埋沒豫
章城時時紫氣斗間明
占者已知吾國興君侯佩之可

千齡

秦鏡歌

玉之榮石之英光瑩豈若秋金精秋金之精鑄鏡成良
工錫以銀華名銀華顏色如霜雪攜向秦宮歎奇絕珊
瑚臺上吐菱花玳瑁匣中生明月夜籌已竭曉籌終宮
女對之難為容雲鬟被首黛渝色我貌如心不堪飾早
知鑑心如鑑貌漢兵敢犯咸陽道咸陽漢殿空中立秦
鏡團團畫飛入至今鬼母夜深泣

白紵歌

闔廬宮中夜撾鼓宮樹烏啼月未午玉缸提來酒如乳
白紵衣成向君舞美人醉起行步難腰間珂珮聲珊珊
肯緣嬌愛減君歡寶釵墮地不敢言宮中門戶多無數
君恩反覆日幾度明朝重著舞時衣心中已道不相宜

空城雀

汝雀汝雀亦何為有身不向他處飛却入空城長苦饑
空城四面盡焦土滿地青蒿幸無主飛來飛去啄蒿實

既無矰兮復無罟豈不見官倉有鼠食官米所食縱多
寧損幾一朝倉吏來捕爾爾罪莫逃終磔死

當窗織

當窗織貧家女兒堪歎息隔牆惟聽伊軋聲墮珥欲收
應不得兩日織成花錦段盡輸上官猶誠緩夫壻復來
催上機豈念身穿藍縷衣君不見富家娘不識蠶繅著
繡裳

涼州行

涼州城頭聞打鼓涼州城北盡貔虎羽書昨夜到西京
敵兵已犯涼州城涼州兵氣若雲黑百萬人家皆已沒
漢軍西出笛聲哀羌騎聞之去復來年年此地成邊土
竟與羌人相間處羌人有婦能漢音漢女亦解調羌琴
調羌琴按羌譜夫壻從軍半生死美人踏筵尚歌舞君
不見古來邊頭多戰傷生男豈如生女強

短歌行

青天上無根日馳光暫明還復黑晝夜相催老却人

忽忽吾年四十七偶看舊鏡鏡為羞昔髭未生今白頭
朱顏丹藥已難覓青史功名行且休歲歲年年待富貴
富貴不來老還至老既至今百事非病妻對之怨且詈
妻年比我雖稍卑近亦摧顏如我衰一生仳離殆居半
此世歡娛能幾時縱多子女知何益北邙冢墓無人識
古往今來共如此我亦胡為空歎息人生滿百世豈多
尊中有酒且高歌有酒不歌奈老何

五言律詩

除夜客中二首

歲月遽如許蹉跎老却人一年惟此夜明日又逢春湖海未歸客風塵多病身感時渾不寐燈火獨相親

擾擾百年內悠悠萬事虛青雲時不至白首歲將除晝燕空隨俗占雞嬾發書未知從此去身世復何如

郡齋度歲二首

失脚雙溪路今經兩度春不堪飛雪夜還作望鄉人世事方如夢生涯笑此身惟應兩蓬鬢不負歲華新

條風纔應律，栢酒又浮盃。
舊臘隨宵盡，新年逐曉來。
浮生蒼狗變，莫景白駒催。
自歎憂時客，初心寸寸灰。

寄寧之鵬南兄弟二首

攜家非得計，世亂且求安。
有季俱行役，誰人救急難。
月從愁裏沒，雪向望中寒。
昨夜鄉書到，知君不忍看。

一自干戈後，先廬幾處存。
遽成豺虎峽，愁殺鵲鴒原。
歲酒空今夕，春風非故園。
憂來無避處，只是倚衡門。

示全真張子愚

無從歸故國客思滿窮秋
兩地隔千里一身翻百憂
夢回高士榻情繞羽人邱
我亦栖栖者時同說舊遊

贈友

擾擾干戈際天涯人未歸
一身為逆旅十月未寒衣
江漢風波阻鄉關書信稀
危途恐相失歲晏重依依

投王郡守二首

已落時人後誰能說姓名
惟應馬南郡偏重鄭康成
賓館懸牀待公庭罷吏迎
為居門下久童僕亦多情

卒歲囊無褐為儒坐有羶每因官俸薄時動故人憐慷慨空前志蹉跎已莫年爭如歸去好家在白雲邊

投同僉公

授鉞幾專征分藩復此行身為漢飛將家若魯諸生秘畧三邊服妖氛一劍橫已多門下客持筆待功成

郡齋守歲二首

守歲寒齋裏開盤試奠辛孟行猶是臘酒醒即逢春天地長為客風塵歎此身歲時追往事獨有老隨人

節序清尊外光陰列炬前屠蘇初入酒犬馬又催年筋
力都非舊容顏豈更鮮餘生有如此盃至且頻傳

避地二首

轉粟百里道竄身千仞巔人行危棧外家在畏途邊門
巷盡營壘僕夫皆鎧鋌亂離今若此何日是歸年

邊隅兵又動咫尺路難通妻子艱虞裏鄉關震蕩中半
生憂世變此日值途窮悶極惟思醉清尊幸未空

九靈山房集卷三